



Adresa: **Ul. H. Čemerlića 39a**  
71000 Sarajevo  
<http://www.voda.ba>

tel. +387 33 726-400  
fax. +387 33 726-423  
e – mail: [info@voda.ba](mailto:info@voda.ba)

Broj: **UP-1/21-3-40-240-5/26**  
Datum: **10.06.2026. godine**

«Agencija za vodno područje rijeke Save» Sarajevo, rješavajući po zahtjevu pravnog lica „PROMEHANIK“ d.o.o. Visoko, za donošenje rješenja o vodnoj dozvoli za ispuštanje otpadnih voda sa lokacije poslovnog objekta za servisiranje motornih vozila u naselju Podlugovi, Ilijaš, na osnovu člana 109. stav (1) tačka 2. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi:

### **RJEŠENJE** **o vodnoj dozvoli**

1. Pravnom licu „PROMEHANIK“ d.o.o. Visoko, daje se vodna dozvola za ispuštanje otpadnih voda sa lokacije poslovnog objekta za servisiranje motornih vozila u naselju Podlugovi, na zemljištu označenom kao k.č. broj: 2568/1, K.O. Podgora, općina Ilijaš.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola, od strane drugih nadležnih organa, a sve u skladu sa važećim zakonskim propisima, odlukama i dr.
3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uvidajem na objektu, pod sljedećim uslovima:
  - 3.1. Da investitor obezbijedi da se sistem za prikupljanje, prečišćavanje i ispuštanje otpadnih voda kao i objekti izgrađeni na lokaciji servisa motornih vozila, održavaju u funkcionalnom stanju i koriste u skladu sa namjenom i uslovima iz ove vodne dozvole.
  - 3.2. Da Investitor u roku od 6 (šest) mjeseci izradi Projekat izvedenog stanja za sistem prikupljanja, tretmana i ispuštanja otpadnih voda sa lokacije servisa motornih vozila, koji će obraditi izmjene koje su nastupile u toku izvođenja radova u odnosu na osnovni projekat i tehničko rješenje ispusta (ispusna glava sa žabljim poklopcem) u rijeku Bosnu. Investiciono-tehnička dokumentacija treba biti urađena od strane projektne firme koja ima pribavljeno ovlaštenje od strane Federalnog ministarstva poljoprivrede, vodoprivrede i šumarstva (lista «A»), a u skladu sa odredbama Zakona o vodama i treba da obradi sva pitanja definisana članom 5. Pravilnika o sadržaju, obliku, uvjetima i načinu izdavanja i čuvanja vodnih akata, koja su bitna za konkretan slučaj («Službene novine Federacije BiH», broj 31/15, 55/19, 41/20 i 63/22).
  - 3.3. Da se nizvodno od ispusta otpadnih voda ne uzrokuje erozija obale rijeke Bosne.
  - 3.4. Da se aktivnost pretakanja motornih ulja obavlja u zatvorenom prostoru za tu namjenu i na način da se onemogući rasipanje i spriječi onečišćenje voda i tla.
  - 3.5. Čišćenje separatora i pratećih elemenata, te odvoz i konačno zbrinjavanje otpadnog mulja i taloga, kao i opasnog otpada sa lokacije predmetnog poslovnog objekta može vršiti isključivo ovlaštena firma za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja taložnika i separatora ulja i masti, neophodno je voditi službenu evidenciju i arhivu.
  - 3.6. U toku važenja ovog Rješenja, korisnik predmetnih objekata je obavezan poduzeti sve potrebne mjere kako bi kvalitet tehnoloških otpadnih voda, a prije ispuštanja u recipijent, zadovoljio granične vrijednosti u skladu sa članom 21. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj: 26/20, 96/20 i 1/24).
  - 3.7. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa članom 19. stav (4) Uredbe o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.
  - 3.8. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).

- 3.9. Sadržaj (mulj) iz uređaja za prečišćavanje otpadnih voda i ostali otpad ne smije se odlagati na česticu «vodno dobro», odnosno u vodotoke i na njihove obale.
- 3.10. Na predmetnoj lokaciji nije dozvoljeno indirektno ispuštanje otpadnih voda u podzemne vode.
- 3.11. Osigurati priručna sredstva za brzu intervenciju u slučaju nekontrolisanog istjecanja nafte i naftnih derivata, kako bi se spriječilo onečišćenje voda i tla (piljevina, prikladni apsorbenzi, odgovarajuće posude, uređaji za pretakanje i sl.)
- 3.12. Investitor je obavezan pridržavati se svih mjera i uslova propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda, te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove dozvole, korisnik predmetnog objekta „PROMEHANIK“ d.o.o. Visoko, je dužan provoditi sve mjere i aktivnosti propisane istom.
6. Ukoliko radom predmetnog objekta nastanu štete bilo kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
7. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
8. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima autoservisa sa pratećim sadržajima obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
9. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
10. Ova vodna dozvola, shodno članu 117. stav (1) Zakona o vodama, daje se sa rokom važenja od 5 (pet) godina od dana pravosnažnosti ovog rješenja, pod uslovom da se ispune obaveze iz tačke 3. dispozitiva.
11. Prije isteka važenja ove dozvole, Investitor je dužan da podnese zahtjev za izdavanje nove vodne dozvole.
12. Ova vodna dozvola može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev.

### **O b r a z l o ž e n j e**

Pravno lice „PROMEHANIK“ d.o.o. Visoko, zahtjevom broj: 0206/26 od 02.06.2026. godine obratio se ovoj Agenciji za donošenje rješenja o vodnoj dozvoli za ispuštanje otpadnih voda sa lokacije poslovnog objekta za servisiranje motornih vozila, u naselju Podlugovi, Ilijaš, na zemljištu označenom kao k.č. broj: 2568/1 K.O. Podgora.

U provedenom postupku dostavljena je i pregledana sljedeća dokumentacija:

#### **A. Opšta dokumentacija**

- Aktuelni izvod iz sudskog registra broj: 043-0-RegZ-24-003489 od 20.11.2024. godine izdat od Općinskog suda u Zenici – ovjerena kopija,
- Uvjerenje o poreznoj registraciji izdato 20.11.2024. godine, od strane Porezne uprave – Kantonalni ured Zenica-ovjerena kopija
- Dokaz o uplaćenju upravnoj pristojbi,
- Rješenje o odobrenju za građenje objekta autoservisa broj: 05/1-19-694/24 od 04.10.2024. godine izdato od strane Službe za prostorno uređenje i zaštitu okoliša, Općina Ilijaš-ovjerena kopija,
- Rješenje o izmjeni rješenja o odobrenju za građenje objekta autoservisa broj: 05/1-19-1538/25 od 21.07.2025. godine izdato od strane Službe za prostorno uređenje i zaštitu okoliša, Općina Ilijaš-ovjerena kopija,

- Rješenje o vodnoj saglasnosti broj: 07-06-21-1956/24 od 14.03.2024. godine izdato od strane Ministarstva privrede, Kanton Sarajevo,
- Rješenje o urbanističkoj saglasnosti broj: 05/1-23-180/19 od 22.04.2022. godine izdato od strane Službe za prostorno uređenje i zaštitu okoliša, Općina Ilijaš- ovjerena kopija,
- Rješenje o vodnoj saglasnosti broj: UP-1/21-2-40-035-2/24 od 26.01.2024. godine izdato od strane «Agencije za vodno područje rijeke Save» Sarajevo,
- Zapisnik o izvršenom tehničkom pregledu građevine od strane Komisije za tehnički pregled izvedenih radova, dana 22.05.2026. godine

#### B. Tehnička dokumentacija

- Glavni projekat - vodna saglasnost, PROMEHANIK d.o.o. Visoko, servis za motorna vozila, broj 94.VS.PER.X/23, decembar 2023 godine, urađen od strane „Perspektiva inžinjeri“ d.o.o. Visoko.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari i u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», br. 31/15, 55/19, 41/20 i 63/22), izvršen je obilazak predmetne lokacije i tom prilikom sačinjen zapisnik o uviđaju broj: UP-1/21-3-40-240-2/26 od 09.06.2026. godine.

Uvidom u dostavljenu dokumentaciju i izvršenim uviđajem na licu mjesta može se konstatovati sljedeće: Lokacija na kojoj je izgrađen poslovni objekat namjenjen za servis motornih vozila nalazi se u naselju Podlugovi, Ilijaš, na zemljištu označenom kao k.č. broj: 2568/1 K.O. Podgora.

Osnovna namjena predmetnog poslovnog objekta je pregled vozila i servisiranje vozila.

Na predmetnom lokalitetu se nalazi glavni objekat u kojem su u prizemlju smješteni prostor za prijem i servis motornih vozila, predprostor i sanitarni čvor. Ispred objekta je plato za parkiranje vozila.

U poslovnom objektu autoservisa se vrši pregled i servisiranje vozila. Izvršen je tehnički pregled izvedenih radova na predmetnom objektu i sačinjen zapisnik o istom.

Za aktivnost ispuštanja otpadnih voda na predmetnoj lokaciji izdata je od ove Agencije vodna saglasnost broj: UP-1/21-2-40-035-2/24 od 26.01.2024. godine, na projekat prema kojem su se trebali izvesti radovi na terenu.

Prilikom uviđaja utvrđeno je da su na terenu izvedeni radovi na sistemu za prikupljanje, tretman i ispuštanje otpadnih voda s tim da je izvršena izmjena na dijelu koji se odnosi na mjesto ispuštanja prečišćenih otpadnih voda.

Otpadne vode koje nastaju kod povremenog pranja kanala i unutrašnjeg radnog prostora se pumpama prebacuju u interni kolektor te odvođe na separator masti i ulja. Na isti separator se dovode i oborinske onečišćene vode sa uređenih saobraćajnih površina koje se prikupljaju sistemom slivnika i kanalizacione mreže.

Prema projektnoj dokumentaciji na koju je data vodna saglasnost planirano da će se poslije okna prečišćene vode odvoditi u putni kanal, sa krajnjim ispustom u rijeku Stavnju.

Prilikom uviđaja utvrđeno je da se prečišćene otpadne vode nakon okna za monitoring odvođe u rijeku Bosnu preko parcele koja je u vlasništvu investitora.

Uvidom u projekat utvrđeno je da se planirani poslovni objekat nalazi na dijelu čestice koji je izvan granica vodnog dobra kao i izvan pojasa dopiranja velikih voda rijeke Bosne ranga pojave 1/100 odnosno ispoštovane su zabrane propisane članom 12. i članom 96. stav (1) tačka 16. Zakona o vodama.

Snabdijevanje vodom za potrebe predmetnog objekta se vrši iz gradskog vodovoda.

Na predmetnoj lokaciji ne postoji javna kanalizaciona mreža.

Istrošena motorna ulja prikupljat će se i odlagati u posude namijenjene za tu svrhu i zbrinjavati od strane ovlaštene firme.

Tačka 4. dispozitiva rješenja propisana je u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07, 10/14 i 03/16).

Na osnovu provedenog postupka, konstatuje se da je podnosilac zahtjeva PROMEHANIK d.o.o. Visoko, ispunio minimum uslova za izdavanje vodne dozvole za ispuštanje otpadnih voda sa lokacije servisa motornih vozila u naselju Podlugovi, Ilijaš, te je riješeno kao u dispozitivu ovog rješenja.


Podnosilac zahtjeva je, na ime izdavanja ovog vodnog akta, izvršio uplatu federalne pristojbe iz tar. br. 43. Zakona o federalnim upravnim pristojbama i Tarife federalnih upravnih pristojbi («Službene novine Federacije BiH», br. 6/98, 8/00, 45/10 i 43/13).

**Uputa o pravnom lijeku:**

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.


Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta: Behija Ahmedić, dipl.inž.tehn.

Po ovlaštenju  
Rukovodilac sektora za izdavanje vodnih akata  
  
Nihad Pezo, dipl.inž.građ.

Dostaviti:

- «PROMEHANIK» d.o.o. Ševulje bb, 71300 Visoko (Prilog: Tehnička dokumentacija navedena pod tačkom B. obrazloženja Rješenja).
- ⊖ AVP Sava, ISV-vodna knjiga
- Org.jed. 50
- Org.jed. 40-arhiva
- Oglasna tabla AVP Sava Sarajevo

  
PREUZEO:  
DANA 10.06.2026g  
KENAN ČEHO